

nû bin ich erwachet,	und ist mir unbekant
daz mir hie vor was kündic	als mîn ander hant.
liut unde lant, dâ ich	vom kinde bin erzogen,
die sint mir frömde worden	reht als ez sî gelogen.
die mine gespilen wâren,	die sint träge unt alt.
vereitet ist daz velt,	verhouwen ist der walt:
wan daz daz wazzer fliuzet	als ez wilent flôz,
für wâr ich wânde mîn	unglücke wurde grôz.
mich grüezet maneger träge,	der mich bekande ê wol.
diu welt ist allenthalben	ungenâden vol.
als ich gedenke an manegen	wünneclîchen tac,
die mir sint enpfallen gar	als in daz mer ein slac,
iemer mære ouwê.	

Owê wie jâmerliche	junge liute tuont!
den unvil riuweclîche	ir gemüete stuont;
die kunnen nû wan sorgen:	owê wie tuont si sô?
swar ich zer werlte kêre	dâ ist nieman frô:
tanzen unde singen,	zergât mit sorgen gar:
nie kristenman gesach	sô jâmerliche jâr.
nû merkent wie den frouwen	ir gebende stât:
die stolzen ritter tragent	dörpelliçhe wât.
uns sint unsenfte briewe	her von Rôme komen,
uns ist erlobet trûren	und fröide gar benomen.
daz müet mich inneclîchen	(wir lebten is vil wol),
daz ich nû für mîn lachen	weinen kiesen sol.
diu wilden vogel die	betrüebet unser klage:
waz wonders ist, ob ich	dâ von vil gar verzage?
waz spriche ich tumber man	durch mînen bosen zorn?
swer dirre wünne volget, der	hât jene dort verlorn
iemer mêr ouwê.	

Ouwê wie uns mit süezen	dîngen ist vergeben!
ich sihe die gallen mitten	in dem honege swaben:
diu Welt ist ûzen schône,	wîz grûen unde rôt,
und innân swarzer varwe,	vinster sam der tôt.
swen si nû habe verleitet,	der schouwe sînen trôst:
er wirt mit swacher buoze	grôzer sünde erlôst.
dar an gedenkent, ritter:	ez ist iuwer dîne.
ir tragent die liechten helme	und manegen herten rinc,
dar zuo die vesten schilde	und diu gewîhten swert.
wolte got, wâr ich	der sigenûnfte wert!
sô wolte ich nôtie man	verdienen rîchen solt.
joch meine ich nicht die houben	noch der hêrren golt:
ich wolte seldom krône	êweclîchen tragen:
die môhte ein soldenære	mit sîme sper bejagen.
môht ich die lieben reise	gevaren über sê,
sô wolte ich denne singen wol,	und niemer mêr ouwê.